

思伯子堂詩集

思伯子堂詩集卷三

建甯張際亮亭甫

初歸讀書溪莊望邑南雞岑石鴈諸山 乙卯

及予眷先宇際此良春初戢志踐亡性開情理聖書桑
煙翳深巷風蕙當素除南眺雞岑色雲氣方浩如參差
暮翼眩涵澹波文舒宣父戒逝川陶令爰愛廬冀復識
應定懷往歲已虛望衡止三歎展帙求所居

雪中送臥雲夫子

樹樹盡冰雪條然翁獨行深山多靜悟峻嶺入空明市
迴沉煙火谿寒隱碓聲舊家流水上此去見予情

暮飲嚴山迎燈觀

時予初歸

一笑囊弓懶射蛟
開樽且聽暮鐘敲
奔馳日久增新語
閱歷人多戀故交
細細寒香溫酒座
依依明月轉花梢
江湖回首風波惡
佛火僧廬是樂郊

湯之尹畫

秋林向蘆喫青山
渺何處日夕暮潮生
煙中數帆去

周易畫

蕭條風雨來山深
不知處夕照下空庭
微辨煙中樹

易祖栻畫

蕭然松石屋中閒
流水前頭去不還
小坐柴門放孤鶴

夕陽烏柏葉斑斑

邵武邸對雨

作客愁看楊柳枝
酒闌無那雨如絲
東風一夜生芳草
綠到城南李相祠

種豆

斜陽下牛背
山翠轉氤氲
野屋向溪近
田歌隨處聞
光陰如客過
勞苦與農分
種豆歸來晚
歡然得自勤

水亭坐月

明月了無意
照人生遠心
事從高臥澹
情以靜居深
澗道紆清響
蓮花墜碧陰
夜闌忘露落
坐溼白羅襟

金門以詩集屬爲評定書集後卻寄

偉哉造化秘厥奇乃以毫素宣洩之黃河落天走寸管
渾渾萬里滄海歸羿后挽弓墮九日五光十色堆琉璃
又如璧月朗瑤島天風夜起華星飛鮫人龍女醉歌舞
珊瑚花散紅霞衣我欲相從和鐵笛波濤洶湧愁蛟螭
把此一卷駭光怪胸有明鏡照不疲朱竹垞吳梅村不作袁
才子蔣飴沒壇坫孰與爭先馳

聖皇萬壽溥文敎

詔許儒臣爲箴規當今大手筆誰是草茅宣

德無其司脫寶劍銜金卮日飲醕酒莫復悲君不見襄

陽至今屬浩然持節何似行吟詩

朱四益謙

元登

秀才晚過二如園次早送之歸松

谷

暮從風雨至澆酒寒燈前朝聞竹下露獨向溪上煙萬
象獻元化眾籟何清妍卻顧谷口路豁達開高天適意
讀周易何必懷百年但期復來過予情方浩然

宿松谷

松風吹不斷涼露滿柴關蟲語夜如雨月明天在山飛
泉扶竹聽暗閣逐螢還勝地多佳士開樽一笑顏

過蘆坑書屋贈益謙

東坡先生詩集卷三
蕭然掩茅屋獨臥與山深見客悄無語看雲時有心松
聲喧澗月谷口起溪禽得便從君話清風遂滿襟

日夕

日夕微雨歇獨返趨林邱大哉天地心萬物得所求稻
田既成種桑柘亦已稠役役百年身乃爲溫飽謀浩歌
命杯酌俯仰毋愧憂

讀古山先生詩感賦

祝融抱日升扶桑虛堂爽氣來八荒風吹萬竅互鏗鎗
七絃一撫天蒼涼先生少年自學道自謂於詩非所長
勸人學詩學子美墨汁欲洗民瘼瘡靜觀造化得深長

往往韋杜森相當岱宗秋色冠東海岷峨屈注開滄江
空山野水忽暮雪桃花乳燕交春塘先生老懷最寬厚
每聞大政意慨慷忠肝義膽無所放精誠著紙如星光
開陳大易孔孟訓勸我不僅爲詞章

先生深於易著讀易慎疑

安得

赤手翻銀潢招先生魂騎鳳凰歸來歸來洋溪

先生居里陽

齋中曉起率爾志慨

晨起事盥沐曠然天宇清開軒讀舊書好鳥多新聲竹
下籜稍隕池上花初成因知夜來雨風澗時琮琤萬物
向曉動元氣如孩嬰少歲一以逝俯仰今古情終期力
耕作豈曰遺世榮

山齋夜坐

夜中素月生萬籟作復止修竹何蕭蕭山氣白如水煙
空螢火至露重荷香起天末望佳人河漢渺千里青鬢
照成霜孤燈深碧裏

苦憶

苦憶南陽舊諸葛鞠躬盡瘁欲何爲孫曹割據終三國
伊呂遭逢各一時廢井竟銷炎運火陰風長繞出師旗
大星隕後西川陷淚灑陰平有斷碑

夢李大寶敷

仙根

秀才

君時居松谷

世人口不一入夢頻三宵波濤撼五嶽寸心不可搖大

鵬振健翼鳩鴟譏飄飄顧影亦自傷匪唯蹤跡遙願作
天上風吹君騰九霄素手扶雲漢日月俱光昭鬱鬱青
松枝蔽虧蔭甘蕉獨寐恍見之起視愁驚颿

酒後題唐子畏神龍圖

平生用志如用兵早於進步圖退步歲月消磨百感生
酒酣往往輕世務唐生汝亦嶽崎磊落人乃以畫筆名
千春龍乎龍乎不可馴白日破壁生風雲雕鞍寶鐙金
絡頭貴人有力驅騁龍乎龍乎不屑留卽嫌鱗爪照
日月豈有汗血售公侯唐生汝若附宸濠豈能意氣凌
其曹此圖自得猶龍意頭角嶄嶄滄海高只恐夜來竟

飛去乞我茅屋毋波濤我嘗一過唐生宅清水離離映
白石聞汝家徒空四壁世人且不好真龍此圖換米安
得食唐生當日定不哀鐘鼓饌玉非本懷丈夫不立功
天地役役溫飽何爲哉神龍見首不見尾龍乎龍乎吾
師爾

偶憶虎邱舊遊口號二十八字

白公祠下水清華白舫清樽共菊花醉向青天問明月
今年秋色在誰家

贈朱丈耕亭先生

時年七十

男兒當驅百萬軍勒燕然石圖麒麟不然手散千黃金

立濟鄉里無窮民安能獨爲子孫計坐使東家如勞薪
達哉此翁非常人拓扶世網全其真觀其亢直自本性
或曰高義何嶙峋畫堂花蠟紅錦裯富家讌客羅八珍
仰天大笑非吾倫籍田告廟粒族士只今漉酒時葛巾
山蒼蒼兮萬木深玉蟾濛海奔寒雲香醪潑菊十日夜
呼兒醉侍青城君我亦豁落厭卑俗羨翁鵲舉離凡塵
秋風一夕起天末夢隨扶杖楊溪濱

熊大

守禮

嘉會試福州走筆送之

蔣亭先生令子

立秋十日秋水生竟呼三老揚帆行丈夫之身若舟楫
濟此一世猶爲輕

國家進身始科第去矣毋忽黃紙名越王城外江冥冥
白月欲出楓林青念君少年始作客風波獨夜難爲情

延平舟夜

是夜白露

江淨月華流涼風動劒州露先雙鬢白天入百蠻秋昔
歲花朝後登臨感舊遊今宵歌管外飄泊尙孤舟

南臺秋望

落日迴風鼓角鳴黃雲白浪勢飛橫歌樓黯黯臨寒浦
戰艦蕭蕭轉大旌苦逐驂駟羣雁驚翻愁鷹隼擊鯨鯢
百蠻天地開滄海素節憑危萬里情

八月十六夜酒後從嚴山登烏石山鄰霄臺戲作

太白一醉死好月無人知老兄發高興邀我同探奇山
中何所有怪石滿地走大者拜丈人小者呼老友但聞
風蕭蕭倒踏錢塘潮須臾嗒然去隱約來笙簫扶桑東
復東萬馬青濛濛金烏歎雙塔抱出珊瑚宮故鄉引西
望江天何洪蕩咳唾入波濤蛟龍吹雪浪眾星光羅羅
渴欲吞銀河愁攀北斗柄倒瀉仍無多是時秋氣清婆
娑最高頂心境兩空明衣裳忽松影流觀李侯書李陽冰篆
在般遂覽朱子字斧鑿留姓名名山一苦事我方酩酊
甚欲賦不成篇松枝畫薛壁豈必求千年會逢驟雨作
淋漓隨剝落且問白兔公今宵可如昨

觀宋朝三十六名臣畫像歌

謝退谷

金鑾

先生宅遇雨其友陳丈惕園

庚煥

攜以相示

素幅十軸虛堂開羣賢如日當高臺英姿颯爽動毫髮
生氣迴山盤空來豐髭廣額各異狀垂紳正笏儼相望
孝肅鄭公最貌奇武穆信國尤神王其餘意態難具陳
要皆慷慨經世人胡使二聖俱蒙塵帝邪姪邪終沉淪
官家前後失四策致寇自滅蓋有因我言未畢風蕭蕭
跳珠四壁生秋潮金烏反吸海水立玉龍欲下雲旗飄
陳丈掀髯忽長歎吾子之言思過半澶淵速退旣積弱

安石作相遂萌亂賊來止有一李綱苦以戰守爭廟算
飛鳥未盡良弓藏坐棄中原竟塗炭廣文先生卻笑語
祇如今日翻盆雨紛紛興滅何足數圖中諸公各千秋
宋元到此無片土我尙傷心金字牌恨不痛飲黃龍府
陳丈卷懷且歸矣古來名臣視其主

偶憶

妙高臺上生明月楊子津頭正亂流一別南徐晚秋色
青天碧水兩悠悠

呈別退谷先生

十月江頭風浪多錦帆西上狎蛟鼉天心正到清寒候

人事難爲慷慨歌南浦煙花催畫漿東山絲管隔長波

王郎流落中郎老回首千秋可奈何

先生贈予詩有素心幸猶在千秋以

爲期句故云

翔鸞

十月九日發福州作

翔鸞一飄泊遠逐萬鴉飛故侶應相待靈山不可歸風

雲催急景江海亦寒暉歲暮空摩翮寥寥玉粒稀

古田山中見紅葉有作

去年我出戚家橋武林江上生春潮扁舟棹入樹深處

打篷花雨紛飄蕭竭來肩輿越山路空谷幽蘭感遲暮

何意秋光似遠人十月依然未歸去初疑百尺珊瑚竿

又疑八寶瓊玓闌孤峯如黛映斑斑苦憶繡被堆雙鬢
日斜巖徑作水綠中有湘女啼煙寒天公與種相思豆
相思相思何當還自憐歲歲辭故國吳門越浦飄零極
祇將小草笑謝安未敢轉蓬怨曹植過此丹林碧嶂閒
摩挲寶劍無顏色北風蕭颯重回頭黯澹昏鴉一行墨
十五夜延平驛中對月

朔風吹暝葉聲乾孤坐江樓怨玉盤天上又圓今夕影
客中知是幾回看荒城急柝銷魂易遠道高堂入夢難
安得全家移碧落夜同星斗映闌干

十九日偕建州丁樸夫家敦復焜兄弟遊歸宗巖

留宿

山靈遲我至曠望天宇清出郭三十里始見峯崢嶸峽
門闕斜徑石氣盤空青小大各自位磊落俱不平高崖
如傑士正立不肯傾幽洞如怨女默處不自明北風樹
閒來颯颯如人行條然徧巖壑鉅磬餘琤瑤上齊飛鳥
背下踏寒蟲聲荒亭坐超忽理感非一情數子有佳語
大河時前橫寺僧鳴晚鐘請客治素觥醉憶天下事不
寐起屏營但看星月光嵌空疑欲崩

冒雨行慶元山中

一聲泥滑滑唱路感與夫天惜遊蹤遠風吹病骨孤白

茅低虎竇紅樹落鴉雛莫歎輕行險乾坤總畏途

自大港放舟麗水時日西矣回望上流諸山杳靄
得態率爾成篇

天地有秀氣出爲人間奇隱約不可定靜者偶見之我
從上流來延覽停橈遲羣峯亦曠迴頗惜寒無姿日光
瀉澄江返照空青垂娟娟諸山色如十五女兒虛嵐結
靜態列岫凝修眉風吹煙水閒憶抱明鏡時始歎大造
化難以意計推凡今行路人當境回頭思

晚發麗水書感四首

江徧風雲立山虛草木鳴蕭蕭雙去鳥莽莽一孤城病

減筋骸力寒深骨肉情莫令波上日來照淚痕明

嗚咽灘頭水茫茫蕩晚暉瀑流翻石落帆影破山飛道
路飢寒切風霜性命微白頭慈母在此候倚柴扉

憶昔辭家日山中正早秋江湖舟一泛歲月水東流餐
菊留閩晚看梅入越愁栖栖清露裊難問鷓鴣裘

本切雲龍望翻遲海燕回月寒搖櫓去沙暝撲衣來鷗
鷺隨行侶乾坤負不才今宵無鼓角偏使旅魂哀

青田石門洞觀瀑布

劉誠意書院也

誰將銀漢水倒挽石崖端一片雲花落滿山風雨寒因
知此巖壑定有玉龍盤安得呼劉叟從予上下看

舟過青田弔劉誠意

灑落君臣契孰訾終緣嫉惡死猶疑但師陸抗心原苦
曾比陳平計每奇落日風雲何慘澹空城草木亦威儀
魚龍夜偃孤舟冷飄泊乾坤有此悲

自麗水至永嘉百餘里山多石崖瀑布急目盪胸
得二十八字

峯峯翠削切雲開跋腳船頭日幾回最好澄江斜照裏
一條雪練忽飛來

長至後一日永嘉舟中作

風急天寒落日昏茫茫高浪截雲奔九衢雨雪思燕市

百越山川出海門
江路更逢長至冷
酒懷猶擁短衣論
明時歲月終何用
且控波濤踏老鼇

晚登東山眺望

海色起千里
蒼然出雲中
迴潮送落日
澎湃生悲風
山虛靈籟作天淨
寒光空木葉
竟飛盡
行子猶轉蓬
登高一長嘯
悵望懷謝公

留題江心寺

朔風起江海
萬葉下滄波
半夜生明月
清輝滿薜蘿
天涯仍歲晏
雨雪欲如何
雲水蒼茫地
愁聞去雁多

飛霞洞

高閣倚斜照飛鳥沒寒水空憶小謝詩餘霞散成綺

謝客巖

昔因謝康樂題詩迹已陳幽巖有芳草歲晚若爲春

華蓋山

洞天白雲曉秀色滿江城昨見峯頭月朝思滄海行

迴鵲山

落日暝色來濛濛散平楚江上素月生寒潮沒沙嶼

夜聞歌者寄黃六未涯舉元戴大惕庵杰福州

江上風波日夕生江天獨臥倍含情故人南望千餘里

一夜清歌月滿城

夜發永嘉至樂清作

野曠江雲盡，天清海水寒。
孤城聞畫角，夜起月中看。
忽憶天台勝，乘潮發酒闌。
西風收片席，北斗正闌干。

過四十九盤嶺

白雲何處起，衣上忽空明。
石壁如人立，天風送我行。
入山山減色，聽水水希聲。
不見高深際，堪師造化情。

能仁寺宋元祐鐵鑊歌

颶風夜捲崖山波，西臺遺老徒悲歌。
竹如意碎白雁啄，六陵石馬寒嵯峨。
此鑊胡不鑄干戈，膏敵血使邦無他。
鬱此百鍊不折氣，千年萬載荒山阿。
牛兕獮角鬼火灼。

無有缺裂無偏頗一尺之水慘紺綠使我一見千摩挲
元祐壬申十一月劉氏鑄此施維那立高五尺周七尺
計十斤重以鎮魔是時垂簾得堯舜平反舊政羣賢和
自從宮中賜麥飯交口紹述仍踵訛壽延神霄寶鼎折
青衣北去愁如何康王卽位異靈武避寇往復溫台過
此山綿亙界二郡此時殺氣纏藤蘿此鏤頑然乃不磨
金牌殺將玉孩賞刑政刺謬承嬗嬰撒星椿困襄樊失
大江不守如陽邏到今西湖蟋蟀盡冬青不減黃柑多
我曾臨安弔故關我曾嚴瀨攀松柯山川冷落各無色
此鏤豈有佛護呵少年妄意天下事論興亡若除夙痾

熙甯稷契實禍始二惇二蔡繩煩苛一朝命移天水碧
祇使龍種投蛟鼉滄桑歷劫成古物撫此奚啻百磊螺
高后安民惜不作不然燬此鑄奸科驚飆滿地擁日落
蕭蕭荆棘鳴坡陀嗚呼人代俱已矣且索殘僧傾巨羅
由大錦溪尋大龍湫

錦溪溪路曲莽蒼亂雲生天立石中影瀑飛煙外聲蒼
蒼防峽落杳杳忽雞鳴獨向寒崖望無人共此情

觀大龍湫

一片若煙霧空清不可收直將四海色併出寒崖流
漚欲到地地下先颼颼白日既已匿寒風時未休荒荒

荆榛中杳無人去留向壁坐咳嗽隨聲颯奔投想見三
秋上此焉誰息迹

山中見野人家偶作

始識名山大桃花又一源人依巖作屋地聚石成村呼
客餐瓜果放兒游洞門時時雲氣裏別自有朝昏
高低蔬圃接田少看誰耕鋤落竹松翠水流牛犬聲飲
泉編木渡鑿嶺入天行稍見黃茅上炊煙黯黯生

過馬鞍嶺

東西兩界鬱崔巍鳥道蛇盤一嶂開已漱龍湫收瀑布
欲巢雁宕度雲堆衣裳影碧從天下風水聲虛動地來

此去靈巖仙榜近安禪谷內卽蓬萊

靈巖

奇境闕靈奧獨遊信所之初憩屢成誤稍深遂忘疲柳
厚峯巒互宵密岑峭爭欹崎入洞壁上瞰越嶺天下窺
高崖光時合寒峽氣自私山空亂泉響日落羣鴉飛積
煙晦諸象萬古當蘊疑極幽忽如獲懷異轉若違淹尋
既盡日俯仰皆清暉良恐眾人共復悲來者希寺僧向
暮返濯足東澗漪相將對孤月蒼然環翠微

仙人榜歌

我從大羅一墮不復還天公放我遊名山靈巖突兀見

仙榜卻無赤文綠字形斑斑得非安期輩以此題名懸
歲久蒼頡書迹滅空雲煙大小展旗二峯俱在翠巖聞歌吹至
今遺落搖空翠素月隨風出絳霄山空照之雲滿地皎
然清光併濕布熨珠洗出銀河露千峯化作白芙蓉人
閒望去朝復暮君不見廣成昔日居崆峒許由亦作天
侍中呼僧便磨墨一斗大書姓字榜之首萬古常存天
地閒一生不屑仙人後

入龍鼻洞

老龍夜縮溟渤壑偃臥空巖鼻涕作日月無光風雨寒
洞陰鍾乳時時落攀援百級如入甕回望蒼茫雲海凍

飛峯峭壁各奔投頭上青天隨手動冲融杳窅涼翠結
小語輒答乃響絕但覺高歌山已崩忽驚下視地皆裂
此時竟作淩虛步點滴幽泉墜無數安得吳剛快斧斤
斫取扶桑煮華露

至淨名寺老僧索詩戲作

馬鞍至淨名前後十餘里天在石上出石在天上超高
崖泉一飛片片落雲海幽巖人一行磷磷動石髓峯或
若鳥翔嶂或若馬駛峽或若破開壁或若削峙或如曲
兩肱或如簇五指遠望入煙光窈然如處子近望挾風
聲冷然如奇鬼祇覺眼有花莫能名其美老僧出見客

謂我非凡士月下燒沉檀酒邊備好紙我豈能作詩六
義竊取比

雨宿蓼花嶂下

風吹寒雨急石屋一燈昏嶂勢青天動泉聲白浪翻夜
閒看點鼠山暝喘孤豚誰與驅雲霧明朝出寺門

贈老僧

導師註罷楞伽譯自愛空門冷澹風手指碧山雲起處
一牀煙雨畫濛濛

入靈峯寺

谿碧水潺潺清寒氣滿山夕陽羣峭上疎磬亂泉閒入

洞窮幽趣看花得笑頻
天際鶴相向就松關

觀音洞

誰擘靈山此洞開
尙橫片石拒風雷
常疑日月雲中盡
忽放峯巒壁上來
松翠暗垂交竹路
石龕高置象蓮臺
當空歷歷飛泉影
眞作珠簾一桁猜

寺中夜坐

來者不可知
已往復何慕
寒宵萬慮息
所得乃吾趣
東巖素月上
靄然見煙樹
頗覺來空香
久之了無遇
但聞壁上泉
湲湲自流注

過謝公嶺遇雨至石梁洞

清旦意超忽涉溪趨嶺上既與寺僧辭稍憫興夫唱紛
騰驟雨作絕磴翻波浪跣足煙靄中天公助豪放顧盼
索嶽崎杳渺難名狀竟如石季倫四十里錦障翩翩隱
綠珠使我不能忘上已挾霧奔下直隨風颺筋力輒於
綿眼花大於益但見鯉魚潭雲水光晃漾茫然念一身
乾坤誰依傍徑轉路就平峯迴洞相望參差夾綠竹巖
磴立丹嶂左側踐幽深飛梁杲方漲一線露空青照映
若畫舫正恐雷電急天崩不可抗出山人赤城當著屐
幾緡

雁湖歌

日澹泊兮煙模糊波沸蕩兮風號呼下沈太陰走地脈
上浸列宿浮天樞化工似厭五湖卑卑不自立千巖萬
壑之上湧此七坎絕世無淵源太古碧玉色冉冉照映
羣花跼雁乎雁乎歸來乎海上月出懸驪珠卻顧海水
不知處橫空仰見銀河曙夜半月高老雁鳴湖雲一片
空中去悄然兼憶一百二十峯內有十八瀑布如飛龍
左手鐵笛右芙蓉予將來往水霧空濛中

至天台不入山感賦

白雲出華頂藹藹結靈芝我欲從之去天風無盡時故
山狎猿鶴明月與前期夢到石梁外寂寥天地知

晚次黃巖

驚風驅曠野落日黯蒼蕪馬盼寒雲立鴉翻老樹孤埃
塵爭短鬢雨雪畏長途草草荒城飯母嗟脫粟羸

館頭驛阻雪

歲暮來官驛偏逢素雪霏江山清愈遠雲水澹相輝靜
愛人圍火寒添母授衣鄉書今未達目斷雁南飛

歸次永嘉見月有作

海風吹月照高城天際歸心萬里明烏鵲寒投荒驛火
虎魚夜偃大江聲唐衢抗志思三代陳亮談兵誤一生
聞道滄溟最奇觀莫希鱗羽傳鯢鵬

溫州謁禹廟感賦

白晝魚龍拜，烏裳青天風雨起。
陰廊徒勞碣石躬，疏鑿可歎河流日獷狷。

勅賜又聞頒內帑，司空何以告。

明堂會稽望斷山陵色，綠字元圭總渺茫。

客有問雁宕之勝者爲賦

憑君思雁宕，神鬼詘雕鐫。
有石皆離地，無泉不化煙。
風雲通變態，鸞鶴幾飛僊。
欲結三閭屋，龍湫絕頂眠。

夜泊聞笛

生不願封萬戶侯，死不當少一扁舟。
夜寒好月在我頭。

露華欲落雲迸流一聲玉笛誰家起吹徹遙心滿江水
紛紛風葉下煙波天末美人愁奈何

過青田

青田城外南風起好挂輕帆沂碧沅一望日斜天盡處
鄉心已滿海雲頭

宿石帆塘

年少嘗輕萬里遊可憐覆水已難收石帆塘外霜如月
夜半聞歌起倚樓

碧湖驛中小酌

翠裘青鬢北風吹越女勸人酣玉卮作客多於霜落後

思鄉最是日斜時花邊鳥語開鈴閣煙外山光到酒旗
拚醉他年好留憶前頭烏柏十三枝

松陽山中折梅花是夜宿城中

山山若雲氣雲裏折花行一笑春歸我千峯月滿城美
人前日別香夢此宵清尙欲羅浮去時聞翠羽聲

江山船曲

煙波日悠悠悠悠見衢州儂家江山船灣在西門頭船
頭紫檀香船尾白沙棠紅艙捲翠幙白晝多輝光衣裘
照江水誰家好郎子莫欲去蘇杭儂船好無比郎來且
安息爲郎悅顏色儂家同年妹

船戶之妻呼爲同年嫂
其媳女年長者呼爲同

年姊妹者呼
爲同年姊
世上難再得江上好花開鴛鴦成雙來阿
姊彈錦瑟阿嫂勸金壺錦瑟一聲聲江風都有情鴛鴦
不肯去飛上船頭行五日蘭溪口十日桐廬首七里瀧
中魚更貴紹興酒布帆緩緩去姊妹如泥絮半月到杭
州纏綿留不住江邊風飄飄江上花搖搖姊妹爲八月節
郎作錢塘潮

過壓潮塘

醉出衢州西岸頭水光山色不勝愁夕陽忽照紅衫影
烏柏蕭蕭古驛樓

十二月初六夜廣信城南驛對月

信州江上月高寒落拓歸人酒後看凍浦蛟龍迴夜眠
荒城鼓角咽風乾星霜歷歷依孤鬢煙水茫茫失故竿
正有白頭燈影下傷心兒婦不團圓

○十一夜飲雨農先生宅話別

置酒華堂月正明朔風吹角落高城中原名士思諸葛
四海何人薦賈生醉裏山川常悵望年來歌舞獨爲情
艱難天地冰霜苦瘦馬晨征百感并

。上官寅齋先生招集葉露蕭紆青廣文高所庵

文惺然雨農舍人何金門公子餞予賦謝

東風一別北風多

三月曾偕諸公飲於舍人即武高齋

何意開樽話薜蘿

歲月催人真轉瞬乾坤知己復高歌衣沾兩浙江邊雪
夢冷三山海上波

七月與先生及金門相見於福州且已予遂由浙西入浙東至是始歸

去歸耕他日暇龐公重與拜婆娑

新城別叔父文衡

歲寒風雪裏置酒解征衣骨肉看無恙關河去獨歸孤
城臨水閉落日見人稀白髮蕭蕭在相思幸掩扉

鳳凰篇爲高烈婦作

烈婦光澤張氏女能讀書朱墨前人之賢否夫
玉淵天卒遂縊以殉

有鳥有鳥名鳳凰雌雄上下雙雙翔雌雄上下雙雙翔

思伯子堂詩集

卷三

三

其雄既死其雌傷前有豫章後有扶桑左有竹實右有
芝英可以食可以宿嗟爾旦暮竟絕吭此鳥有本性本
性實貞良常恥鴟鴞惡但許文鸞祥熒熒天星星星輝
光星星不滅在塚之旁塚旁清風吹化爲同心枝枝枝
必相附葉葉不相離枝枝葉葉不相離千秋萬歲見者
悲

思伯子堂詩集卷四

建甯張際亮亭甫

寄巖山

庚辰

慶豐門外荷塘滿水竹中閒雜種梅更莫看花思往事
春風消得幾徘徊

花朝前夕飲未涯宅卽事

一片清明氣天空夜靜來月臨朱戶動花接綺筵開
酒宜歡會高名每累才翩翩好公子莫厭此追陪

時楊二覺

鄉來自
新城

同朱五贊夫

文望

實敷飲松谷

思伯子堂詩集卷四

佳士論心曠當杯命酒遲園林春窈窕松月夜參差
縞帶初輕解清風亦緩吹興酣多謬誤幸與醉人知

夕陽

石壁翻紅入碧津河梁照眼恨逡巡舊遊絲竹如相戀
平視簾櫳竟不真落葉棲鴉秋有迹空山流水古無人
分明一帶荆榛上吹徧西風起暮塵

半在愁邊半望邊皎然散綺落霞天登高送客悲長別
垂老逢人話少年忽忽江湖雙去鳥蕭蕭關塞一征鞭
卽今休唱吳娘曲暮雨相思倍可憐

目斷停雲醉未醒楓林橘柚與煙平難爲病後懷明月

每向寒中望廢城巷口燕辭公子第山陽笛喚故人情
漢宮魏闕同蕭瑟不待寒旗聽馬鳴

樓中坐月望太弋山白雲

月色淨萬象澄深天無氛鬱鬱太弋山往往見白雲清
輝朗如引素彩成已紛巖翠藹曠蕩露華流氤氲超興
忽滄海靜觀斯大文空洞豁綺疏企遠良多欣

大雨

一片白煙落日光如盪珠蛟龍驅海立天地與雲趨元
氣先滂沛羣靈下嘯呼誰能愧霖雨役役保妻孥

山村積陰遊鵬有得

微微溪路外野色澹冲融煙暝如將雪山寒偶見松雞
聲清半午鳥語在前峯隨意村原步林花落幾重

效何水部體

江郊白日晚春野綠蕪深明月照花樹惠風聞水禽子
息北山志予傷南浦心徒已悵瀨澈未遑淩嶽岑目想
北山泉泉空飛作煙煙飛南浦石相見亦年年

田家雜詩

種稻既當門種瓜復緣屋讀書敝廬中化工時在目內
愧觀古人俯仰多不足夜來一雨過曉起眾山綠北窗
風聲涼脩脩動煙作

夏晚氣佳秀夕野多清暉田家靄初煙雞豚各已歸
聞田水聲起行月在扉庶共有生樂焉知吾道非

野性既習靜時觀朝物華清晨倚簷閒曖曖見桑麻初
日麗眾綠溪山氣轉嘉白雲在空中欲往意已遐

秋風奄已至庭際梧桐落端居任運化寓目登山閣腰
鑣刈香秫人散喧飢雀夕陽映西鄰餘輝滿園藿萬物
以候成念老將焉穫長嘯謝古今暮天望寥廓

溪楊轉風光煙與月俱上涼蟬已收聲曠野多空響蒼
蒼東渡頭老農正來往我時行田歸開門延餘爽勞人
易爲逸際茲澹無想

思伯子堂詩集

卷四

三

東鄰刈早稻相約爲開樽置酒茅堂上列坐半兒孫酣
飲不自束望古懷羲軒側愧長者意骨肉各有恩西風
動新涼醉扶歸衡門酬酢得所歡藹然真意存
志士矢溝壑斯言豈不然倩問一身外此道甯可全戚
戚非憂生諒當愧聖賢亭午旣睡覺山光當庭前偷安
苟旦暮荷笠巡原田

秋禾未轉綠豆葉已凋黃託根旣自殊安能齊芬芳伊
予幼輕薄騁志翰墨場處困不可據望道始回皇對酒
不成酌起視河漢長悲風在四野寒緯鳴東廂已矣復
何歎庶老無功鄉

潛鱗定游淵故柯多倦禽素無經世界力穡北山陰作
息既終日靜夜思素心西溪有明月流光亦已深
微雨藹原上寥寥閒午雞縱橫阡陌閒風煙紛以淒浩
歌靜爲感念往不可齊狂聖有運命英雄無端倪所愧
龐參公偕隱得其妻

越溪暮行至西山

夕陽秋色滿空籟自滄淒鵲帶聲移樹山流影在溪渚
纓扶翠石憩岸掇丹萸雲水清冷極眞思滅景棲

六亭先生試歸敝邑將重蒞臺灣歌以爲別

公車遠自薊門回枉道山城祖帳開人爲

朝廷惜名士天留著述與奇才

先生以機修臺灣郡志故有是行

滄波

無際看秋月白髮相逢戀酒杯此去海鄉諸子弟應同

父母喜重來

昔海寇竊發先生以守禦有功於臺灣民

讀劒俠傳

涼秋七月中萬山生悲風閉門閉寒雨暝色集高桐流
觀劒俠傳慨想虬髯蹤心能傾妓妾客亦真英雄潛志
運天下失時歸海東至今滄溟遠扶餘不可從徒令思
遐舉滿目驚飛蓬

古詩

以下皆嘉慶庚辰八月望後作

白日忽已沒蟋蟀鳴空牀佳人雖獨宿感此故鄉悲

風從何來入戶如彷徨朱顏豈自惜凜凜懷朝霜
弱齡觀日出遠至男嶺峯金烏躍未高翳海光瞳瞳朝
暉正萬象力欲回清風吹噓息煙波上與昭鴻濛此意
復誰知慨慷傷心胸

東南美洞天秀出連台星上有雙仙姝姣好長眉青劉
阮旣幸遇忽復辭娉婷山高石蒼蒼雲深泉泠泠中道
自棄絕十世可涕零

題藕亭先生詩稿

湘君抱瑤瑟獨向洞庭彈壁月空湖影金微寫暮寒會
驂雙鶴馭遺響五雲端亦有悲風調因茲欲奏難

短歌

蓬萊乃在大海東上有仙人乘飛龍浮雲滅沒翳倒景
雨溼瑤草凋芳叢但見白浪茫茫而若雪鯨魚接翅凌
長風天地黯慘無定容遡回欲溯金銀宮君不見穀城
下舊有黃石公豐城劒入波濤中焉能與世論雌雄

李龍眠劉阮入天台圖

李西溪考康家藏予見而愛之爲作此詩

天台山高極連天關仙人來往不可攀風蕭蕭兮泉淠淠
瀑雲容容兮花斑斑見臨流之石室有窈窕之雙鬟我
昔從之竟無路劉阮胡爲舍之去黃梁飯熟胡麻香卻
憶蟠桃不知處但記石梁瀑布飛作煙華頂日落山蒼

然吞聲躑躅誰與傳李生筆下來真仙李生今亦不復
作摩撫絹素爲流連乃知天下情之所至常不沒已過
十世猶千年

作前詩後因憶去年見朱星槎內兄所藏唐子畏
山水畫卷絕佳遂更作歌

安得碧海與丹邱近在咫尺可戲游六如居士作山水
落筆不數荆關儔星槎豪家亦好事寶愛故紙同琳球
酒酣一見來滄洲瞿塘如馬連黃牛千巖秀色映澄流
白雲不盡清天秋浪花煙岫過眼沒空疑著我瀟湘頭
一錢在手立揮去每自玩好無力收他人珍藏娛目意

亦足茫然大笑吾何求只今八月風颼颼溪山葉脫螺
髻浮可以酌酒羣沙鷗

夢中詩

九月初一夜於友人家飲
歸夢與人財此覺而錄之

少年既並集樽俎喜卽治戒酒旣不達縱飲亦可悲惟
有采芝客忘情是我師

紅葉

放眼秋光正可悲數株紅葉復離離蒼涼天地還春色
搖落江山感歲時徑畔白雲飛欲盡宮中流水去何遲
依稀一碧煙轡在錦障誰家擁黛眉

登高初見亂楓殷望遠難爲暮色閒名士飄零生白髮

美人遲暮泣朱顏日斜瑟瑟悲風起江淨蕭蕭獨雁還
莫歎桃源無路覓桃花無主幾斑斑

哭福州謝退谷先生

先生名金鑾侯官縣舉人任臺灣某邑教諭當
海寇竊發郡守倉皇無所爲計先生爲畫守城
之策甚備人賴以安後任邵武安溪有教澤如
在臺灣時得痿痺疾假歸邵武宗人繁露其門
下士持予詩示之過蒙稱許屢扶病爲賓主禮
常慨然曰人才者其進退爲國家之治亂而古
今道統之所系也當今名士大夫多不務汲引

惜其見之不遠大也先生他日幸念之予愧其
言而其謙厚下士之風蓋可見矣庚辰九月得
黃未涯福州來書知已遊道山諸孤幼弱貧苦
薪米不繼其友陳恭甫太史曾爲經紀其喪亦
無力恤其家也追念知己之感成此四首先生
爲人敦躬行人以爲志宋儒之學者予常見其
解大學詩經亦不專主朱子之說也其在日屢
空猶手集故舊門下士詩文之佳者授梓己卯
十月予將歸先生贈以詩笑曰臥病數年不理
聲韻矣今始喜爲之因授其舊作詩數十首屬

爲點定予謹存之多清遠可誦云

慟哭炎方望難招萬古魂聲名徒自好骨肉復誰存
存恤之義落日啼山鬼寒雲黯海門孤城丹旆在慘澹閱朝
昏

一紙征鴻信摩挲涕淚頻蓋棺何月日

未涯來書未及漬酒幾

人
親鄰道喪名儒賤家寒弱息貧秋風滿天地愁殺練裙

澡沐先王澤

朝廷祿薄沾箸書遺尺蠹畫策備渠幃大義艱難奮微
官老病淹鼎湖

思伯子堂詩集

卷四

八

龍已去天上痛攀

髯

去歲嚴霜降爲詩勸我行何圖一日別竟畢九原情冷落
稀知己凋零盡老成西州門外路旦夕大江聲

夜行

秋氣戀深情荒荒夜色行孤村一煙白皓月萬峯明掬
水驚魚柴尋蟲得葉聲自來索幽意肯棄露沾纓

二十四夜夢游太湖枕上成詩

西風吹愁不可理一夜飛入太湖水布帆如剪煙波開
已有好月天邊來飯白鷗兮招蒼龍鯢魚舞兮湖之中

雲欲下兮容容見銀河兮空濛持杯便上碧霄閒徧瀛
七十二點青煙鬢梅花笑我一歸去不向鄧尉山中住
蘸影湖光千萬枝枝枝香雪是相思若有人兮朱霞裳
青蛾皓齒嬌成行醺酒按歌歌吳閭杳然東望天蒼蒼
愛而不見悲流觴

行路難

行路難乃在地之角天之涯北風萬里飛黃沙哀哉王
孫寒無家白日沒兮太行深猩猩啼雨青楓林予遠望
而不見兮唯黃河之湛湛古有蒼梧帝子之斑竹使我
涕泣霑衣襟

寄藕亭先生

手挽碧漢清湘流置之懷抱不浣憂四山風高老木落
偶憶快語林泉幽相知今七載許我千秋在吹噓姓字
使人聞謠詠如麻獨無悔平生意氣峭且疎醉論世事
皆區區先生容我不我辜耳餘末路胡爲乎昨望金饒
山瀑布懸晴雪銀河下挾碧峯飛一片愁心爭皎潔先
生家在饒山南采苓松谷時先生居松谷供鸞驂會當攜我憩
絕壁笑看玉龍戲煙嵐

憶大龍湫作歌

我本豁達人愛與山水嬉昨者一從鴈宕過常常憶念

龍湫奇萬石蒼蒼插碧天白光一片生雲煙清輝照人
不可攬浩如望月滄溟邊霜高木脫天地清欲泝絕頂
收空明風吹宿海落天上日下先作魚龍聲轟訇散入
深潭去澄虛一碧不知處迴翻噴浪濺餘飛春霧濛濛
遠江曙當時快意縱高歌不意聲出驚銀河空中蜿蜒
一百丈飛騰千步如太阿峯迴壁轉雪一道又如積素
分岷峨蒼茫暮色杳無路時有一雞鳴煙蘿謝公遊山
不到此審言名沒將如何我作詩君莫笑商山四皓去
漢廷何似嚴陵獨垂釣丈夫觀世常苦深貴賤久不系
廊廟吾將吹簫擊鼓湫之旁使汝臥龍重騰驤沛爲霖

雨灑四方

十月十二夜對月

霜華麗素月萬里山川寒想見君子懷溫厚有餘歡酌
酒復自勸浩然春風還空明一片心縹緲雲天閒

聞嚴山來松谷望之不至對月有寄

相見情豈極不來意轉違若聽疎松坐共茲明月輝夕
煙皓已滿村墟人語歸獨酌罷清樽霜露還沾衣

寄答金門

落日涼風至登高有所思山空征鳥疾天遠暮雲遲立
業慙文字驚心閱歲時丹砂如可問將與故人期

十一月十五夜宿新城方坪月極明有作

獵獵驚風亂葉飛冥冥小閣倚煙暉溪山清氣初宜月
霜露浮光並滿衣行李共知論歲儉伎儒何補惜身非
三年此夕他鄉夢

戊寅客豫章
己卯客台州

愁見金波麗翠微

十二月二十二夜夢遊天台作

我昔一見天台山一夕思母翩然還石梁瀑布數十丈
至今灑落胸懷閒山光容容花瀉露白雲窈窕幽巖閒
峯巒互轉閼洞壑紫芝翠石時斑斕夢中來往不知路
但逐仙人徑飛度丹邱迎我三青羊萬八千仞凌風翔
赤城霞起照南海華頂皎月流清光天高地廣浩一望

列宿晶晶煙蒼蒼帛道猷太乙子醴泉對酌忘彼此詩
人遊者孟與李我欲招之共一杯襄陽太白安在哉金
庭玉闕一帆影歲暮眞思歸去來

留題石龕巖

辛巳

死喪日促迫

李君實字何玉田先
生十日內相繼卒

榮利非可耽藐茲出

世志慨慷懷棲巖瀑泉上灑落石室中空嵌春山靄已
綠霽景明飛嵐沈寥見郊郭蕭屑聞松杉意愜道非遠
慮長心轉恬發興極虛無游目屬毫纖白日杳然墮峭
壁青巉巉不見山阿人下有千年潭幸託永幽貞庶與

參

明有僧大機者本山東蒙陰張
氏子始來張岩今法身猶在也

憶家兄來儀往任邱道上

今春苦多雨遠道復何如家口貧成累天涯少寄書雁
飛彭蠡暮雲起岱宗虛迢遞關河望還應念倚閭

鳳山晚眺

春波渺已綠日暮有餘心殘雨山城晦重雲水郭深曠
懷觀代謝留感與登臨聞說神仙吏於茲不可尋山下
寓道士王女卿嘗自署神府
朱吏能召雷雨後不知所終

村居偶詠

三月鶯花暮溪山引興長積雲連水氣落日動村光志
在何妨賤名高每不祥逍遙田里內濯足偶滄浪

時雨經宵足林光曉靄滋得泥飛燕疾浮水泳魚遲生
意感羣物春心及我私袂衣輕快體新試惠風吹

曉

虛幕曖沉沉稍見青山曙幽鳥遠林啼涼風不知處華
沼澹生煙春萍綠已布盥沐一逍遙沖襟抱清素

江月亭晚望

漠漠江天合冥冥去鳥飛孤城開返照積水靄清暉歲
僅黎元困身卑志業微滄波何可極方欲泛舟歸

夜泊常口

江天向夕淨萬籟起空虛露氣知秋早鄉心感病餘蕭

蕭山木暗隱隱寺鐘疎明發扁舟逝何因一寄書

八月十三夜對月

醉聽秋城夜漏長青天碧海意茫茫偏於閒處多明月
難得歌時送緩觴水閣閉鴉烏柏老露枝棲鳳碧梧涼
人閒正有相如渴欲引雲仙問玉漿

登釣龍臺

海氣微茫一黑煙空青江影墮孤鶩人家萬樹秋風裏
估客千帆夕照邊紺宇無多烏塔路白雲不盡虎門天
荒臺莫縱登高目霸業消沉久逝川

宿白沙驛

丙子八月廿三日
宿此今月日悉符

一片家山月依然驛路明鄉心孤雁遠秋色暮江清憶
舊方如夢求官豈爲名飄飄天地內俯仰愧平生

宿古嵐山家

煙外水潺潺啼鴉暝色閒數花寒映竹半雨白垂山酌
酒無兼味耕田有獨閒萬峯蒼翠裏時見荷鋤還

試歸後贊夫以書枉問賦此爲報

四度槐花出故山依然風漢自投閒家貧敢諱圖溫飽
親老常虛盼往還五衛瘴嵐悲海角十年

雲日夢

天顏終南佳處差無負待爾能來看翠鬢

望仙詞

黃金樓閣玉闌干
帝女鳴機泣素紈
百萬聘錢輸不易
可憐天上有波瀾

青鳥西飛信未回
漢家亦自有高臺
如何飲卻金莖露
留得銅人泣劫灰

麻姑遊戲白雲鄉
輕薄惟誇鳥爪長
誰信年年精衛在
莫須相見話滄桑

十年服氣學黃庭
碧海青天路杳冥
爲報杜蘭香憶否
人間張碩久飄零

蓬山

縹緲蓬山一萬重
霓旌望斷去來蹤
明河千里無靈鵲
藥店三年有恨龍
天上光陰原易度
月中歌舞竟難逢
飄零苦憶胡麻飯
流水桃花日滿胸

得雨農舍人書

歸雁滿村墟
溪山守舊居
人憐歲寒遠
書到雪晴初
存沒交多慨
功名意久疎
還將中夜月
爲照兩心如

短歌柬朱二

君有李撫剛先輩古
琴一予欲得之以此

我欲召高漸離擊筑使禍正平
搥鼓交姬醉歌十八拍
俠士千人作劒舞不然散髮扶桑東
臥看浴日紅龍宮
卽今百事不稱意徒吟楚些悲回風
櫪園老輩師騷人

抱琴自訴鳴艱辛
乞君惠我我同調
不教砑委長安塵
空山皓月照積雪
酒罷懷古堪愁絕
七粒夜付葦庭蘭
鳥猿不語水幽咽